

氏族典第二百三十卷

楊姓部列傳六

宋二 楊存中

按宋史楊存中傳存中本名沂中字正甫紹興間賜名存中代州崞縣人少警敏力能絕人學孫吳法善騎射宣和末羣盜四起存中應募擊賊積功至忠翊郎遷閤門祇候建炎二年遷榮州刺史高宗南渡從張俊守吳門苗劉之變又從俊赴難遷貴州團練使尋爲御前右軍統領遷文州防禦使御前中軍統制紹興元年遷宣州觀察使二年進神武中軍統制六年爲密州觀察使除保成軍節度使七年爲淮南西路制置使九年遷殿前副都指揮使十年金人叛盟取河南命存中爲淮北宣撫副使引兵與金人戰大敗存中乃自宣化渡江歸行在加檢校少保開府儀同三司蓋錄拓臯之功也十二年拜少傅二十年封恭國公二十八年拜少師三十一年罷爲醴泉觀使進封同安郡王金主亮南侵存中往京口拒敵敵不能濟未幾奉祠隆興元年王師潰於符離起存中爲御營使乾道元年復奉祠二年卒追封和王諡武恭

楊愿

按宋史楊愿傳愿字原仲宣和末補太學錄二帝北遷金人聞愿名索之愿匿民間奔濟州元帥府勸進辟爲屬高宗卽位以元帥府結局恩授修職郎御營司辟機宜文字歷新昌縣丞越州判官秦檜薦之召改樞密院編修官登紹興二年進士第遷計議官召試館職罷主管崇道觀復除祕書郎改通判明州檜旣專政召爲祕書丞未幾拜監察御史臺長言愿資淺當先歷郎官改司封員外郎遷右司起居舍人十三年充金國賀正旦接伴使金使還就充送伴使十四年爲御史中丞踰月升端明殿學士僉書樞密院事十五年罷提舉太平觀又三年起知宣州加資政殿學士移建康府二十二年卒年五十二初愿守宣城表弟王炎調蘄水令過之醉中謂愿曰嘗於呂丞相處得公所通書其間頗及秦丞相之短愿聞之色如死灰憂撓而卒

楊由義

按萬姓統譜由義字宜之開封人家世爲將建炎初京師失守父奉直以軍前正將扈從至杭未幾金復寇杭奉直捍敵於外由義奉母避地鹽官金騎踵至母沈於河由義被執累日而逸領漕薦不

第吏部朱松延請誨其子熹後以父恩補右階監贍軍南庫隆興初盧仲賢使金辱命由義請行以
閣門祇候奉使金國金折之使拜不屈而歸官至刑部侍郎轉朝奉大夫朱熹銘其墓常曰忠義大
節中外稱嘆子九鼎以父任帥襄陽有善政統領蜀賊死國事加贈五官

楊粹中

按宋史楊粹中傳粹中真定府人建炎二年金人大入時粹中知濮州固守不下粘罕以濮小郡易
之將官姚端乘其不意夜擣其營直犯中軍粘罕跣足走僅以身免遂急攻城凡三十三日而陷端
率死士突出粘罕入其城粹中登浮圖不下粘罕嘉其忠義許以不死乃以粹中歸粹中竟不屈而
死守禦官杜續亦死之贈粹中徽猷閣待制

楊邦乂

按宋史楊邦乂傳邦乂字晞稷吉州吉水人博通古今以舍選登進士第遭時多艱每以節義自許
歷婺源尉廡廬建康三郡教授改秩知溧陽縣建炎三年金人逼城時李稅以戶部尙書董軍餉陳
邦光以顯謨閣直學士守建康皆具降狀金帥完顏宗弼旣入城稅邦光率官屬迎拜惟邦乂不屈

膝宗弼遣官說邦父許以舊官邦父以首觸柱礎流血曰速殺我翌日宗弼等與稅邦光宴堂上立邦父於庭有劉團練者以幅紙書死活二字示邦父邦父奮筆書死字金人相顧動色然未敢害也邦父大罵宗弼怒殺之剖其心年四十四事聞贈直祕閣諡忠襄官其四子紹興七年加贈徽猷閣待制

楊照

按宋史孫暉傳楊照者濠州將官也金人圍城急照躍上角樓刺賊之執黑旗者洞腹抽腸而死照俄中流矢卒贈承信郎

楊載

按萬姓統譜載涪陵人以功名自負金人立劉豫載白張浚願得白刃當手刃劉豫以報丞相浚壯其言遂遣之載偕十士至金僞降金任之官行反間豫果廢及欲行謀而十士已亡其八遂決歸計浚以其名聞特賜從事知達州永睦縣

楊冲遠

按尙友錄冲遠興元人張浚試吏興元問楊用中曰公常往來梁洋其人士有從游者乎曰楊冲遠可以爲師雍退翁可以爲友

楊政

按宋史楊政傳政字直夫原州臨涇人父忠戰歿政甫七歲哀號如成人宣和末應募爲弓箭手累功至武顯郎紹興元年遷右武大夫拜恭州刺史政益感奮二年升隴州團練使知鳳州三年金攻饒風關政從吳玠戰關下改明州觀察使四年授環慶路經略安撫使五年金人攻淮政帥師至秦州一戰而拔改經略安撫涇原母留敵境間遣人省視之母唯勉以忠義九年春和議成始得迎母及兄弟歸乞祠以政爲熙河蘭鞏路經略安撫使知熙州十年徙利州又徙興元母卒起復拜武當軍節度使久之拜太尉二十七年卒贈開府儀同三司諡襄毅政守漢中十八年凡利於民者不敢以軍旅廢故爲吳璘裨將及與璘分道建帥執門下之禮益恭世頗賢之

楊晨

按萬姓統譜晨永睦人宣和初試禮部第一丞相趙鼎薦其才召試館職論荆蜀形勢之說除督撫

機宜俾撫諭西蜀吳玠饋遺過禮晨不欲阻其意既還悉上諸郡督以佐用

楊再興

按宋史楊再興傳再興賊曹成將也紹興二年岳飛破成入莫邪關再興殺飛弟翻成敗再興走躍入澗張憲執見岳飛奇其貌釋之飛敗金人於郾城兀朮怒合龍虎大王蓋天大王及韓常兵逼之飛遣子雲當敵鏖戰數十合敵不支再興以單騎入其軍手殺數百人而還兀朮憤甚併力復來頓兵十二萬於臨潁再興以三百騎遇敵於小商橋戰死

楊幺

按宋史岳飛傳飛除後軍都統制命招捕楊幺會召張浚還防秋飛袖小圖示浚浚欲俟來年議之飛曰已有定畫都督能少留不八日可破賊浚曰何言之易也飛曰若因敵將用敵兵奪其手足之助離其腹心之托使孤立而後以王師乘之八日之內當俘諸酋浚許之果八日而賊平浚歎曰岳侯神算也

楊勛

按萬姓統譜勛知新化以善政聞金人犯順勛親率兵拒之及卒邑人德勛不容其柩歸願留葬邑下爭負土以成墳

楊富老

按萬姓統譜富老麗水人七歲喪父廬墓三年不反烏雀來巢木生連理之異紹興中太守奏於朝詔賜粟帛錄付國史

楊芾

按宋史毛洵傳洵吉水人同縣有楊芾者字文卿性至孝紹興五年大饑爲親負米百里外遇盜奪之不與盜欲兵之芾慟哭曰我爲親負米不食三日矣幸哀我盜義而釋之

楊世永

按泉州府志世永晉江人紹興五年以特奏名爲端溪尉寇駱科犯郡境世永貫褚鎧佩兩刃跨羸馬遇賊戰死兵皆號哭詔褒其義勇加承務郎官其一子

楊邦弼

按吳江縣志邦弼字良佐其先浦城人文公億四世孫也來師震澤王蘋因家焉紹興十二年舉進士第三爲博士踰年通判信州遷大理卿改湖南漕不務勾致時稱其得大體遷祕書丞著作佐郎再遷禮部郎以起居舍人使金還擢起居郎中書舍人卒

楊萬里

按宋史楊萬里傳萬里字廷秀吉州吉水人紹興二十四年進士第爲贛州司戶調永州零陵丞時張浚謫永杜門謝客萬里三往不得見以書力請始見之浚入相薦之朝除臨安府教授丁父憂改知奉新縣召爲國子博士遷太常博士尋升丞轉將作少監出知漳州改常州尋提舉廣東常平茶鹽就除提點刑獄召爲尙左郎官淳熙十二年以地震應詔上書擢爲侍讀遷左司郎中十四年遷祕書少監光宗卽位召爲祕書監紹熙元年出爲江東轉運副使朝議欲行鐵錢於江南諸郡萬里疏其不便不奉詔忤宰相意改知贛州乞祠除祕閣修撰提舉萬壽宮寧宗卽位引年乞休致進寶文閣待制致仕開禧元年召復辭明年升寶謨閣學士卒年八十三贈光祿大夫萬里爲人剛而褊精于詩嘗著易傳行于世光宗嘗爲書誠齋二字學者稱誠齋先生賜諡文節子長孺

楊夢齡

按泉州府志夢齡字子壽世永子登紹興二十七年進士調瑞安丞攝縣事歲疫聚食病者千餘于僧寺捐俸資爲藥粥日親察視悉賴以活宰平陽民爲立祠秩滿當道交薦欲處以大察俄卒于旅舍

楊獬

按萬姓統譜獬新踰人紹興間舉進士知吉水縣救荒有政累官司農少卿知明州沿海有小寇獬悉平之海道晏然生平廉介自持博覽強記爲後學所師法鄉人至今祠之于學

楊椿

按萬姓統譜椿眉山入省試第一累任憲節甚有風績後以不附秦檜罷政家居紹興末始自兵部尙書兼權翰林學士除參知政事卒諡文安

楊吧

按肥城縣志吧鄆河里人今爲坊郭社自祖若父及吧凡四世咸敦孝弟同居共財以子傳子以孫

傳孫永無分異

楊方

按萬姓統譜方字子直長汀人清修篤孝行己拔俗隆興初登第平生心慕朱熹調弋陽尉還道崇安叅謁面受所傳而歸趙汝愚帥蜀辟機宜汝愚尋薦于朝召對擢宗正寺簿外通判吉州知建昌軍召除編修官首乞朝重華宮辭甚懇切寧宗卽位除祕書郎出知吉州僞學禁興坐汝愚黨罷居贛州閉門讀書自號淡軒嘉定更化召爲侍右郎官進考功郎官不三月復積忤以去

楊楫

按萬姓統譜楫字通老長溪人與楊方楊簡俱師事朱文公爲高弟時號三楊楫累官司農寺簿奏劄進君子退小人勿徇左右之請以重中書之權飭執政之臣可否相濟以任憂責獎廉靜之操絕奔競之風除國子博士臺臣或干以私答曰臺有紀綱學有規矩當各守其職改知安慶移湖南提刑江西運判卒祀其像于學所著有奏議悅堂文集

楊輔

按宋史楊輔傳輔字嗣勳遂寧人乾道二年進士除祕書省正字遷校書郎出知眉州累遷戶部郎中總理四川財賦升太府少卿利西安撫使召守祕書監禮部侍郎以顯謨閣待制知江陵府移襄陽又移潼川召除顯謨閣直學士奉外祠尋以敷文閣直學士知成都府韓侂胄決意用兵以吳曦爲四川宣撫使輔知曦有異志遣人以欒書告于朝上意輔能誅曦密詔授四川制置使時人望輔倡義輔自以不習兵事遷延兩月曦移輔知遂寧府輔遂以印授通判韓榷而去安丙楊巨源密謀誅曦以輔有人望謂密詔自輔所來聞者皆信曦既誅丙趣輔還成都除四川宣撫使朝廷察丙與輔異召輔赴闕除兵部尙書以龍圖閣學士知建康府卒於官諡莊惠

楊王休

按寧波府志王休字子美登乾道二年進士第爲黃巖尉授南康軍判官時朱熹守郡事悉委之後守洋州金州除益利路轉運判官兼提點刑獄蜀民德之光宗時稱名監司凡四人王休其一也仕終吏部侍郎

楊煜

按寧波府志王休子煜爲吏部尙書

楊簡

按宋史楊簡傳簡字敬仲慈溪人乾道五年舉進士授富陽主簿爲紹興府司理常平使者朱熹薦之改知嵎縣紹熙五年召爲國子博士嘉定元年授祕書郎遷著作佐郎轉對極言弭災厲消禍變之道授著作郎將作少監求外補知温州在郡廉儉自將奉養菲薄遷駕部員外郎改工部員外郎監軍器監轉朝散大夫金人大饑來歸者日以千萬計邊吏臨淮水射之簡戚然卽日上奏哀痛言之不報會有病請去益力乃以直寶謨閣主管玉局觀升寶謨閣待制提舉鴻慶宮理宗卽位進寶謨閣直學士寶慶元年轉朝議大夫封慈溪縣男尋授華文閣直學士提舉佑神觀奉朝請尋以寶謨閣直學士太中大夫致仕卒贈正奉大夫

楊大全

按宋史楊大全傳大全字渾甫眉之青神人乾道八年進士調溫江尉攝邑有政聲紹熙三年召除監登聞鼓院寧宗卽位遷宗正寺主簿慶元元年易太常寺主簿遷司農寺丞修高宗實錄充檢校

官先是韓侂胄用事私臺諫之選爲己羽翼會御史虛位有力薦大全者屬大全一往見大全笑謝決不往明日遂丐除金州至姑蘇以病卒

楊震仲

按宋史楊震仲傳震仲字革父成都府人蚤負氣節雅有志當世登淳熙二年進士第知閬州新井縣以惠政聞辟興元府通判權大安軍吳曦叛素聞震仲名馳檄招之震仲辭疾不行曦遣興州都統司機宜郭鵬飛趣其行益急震仲飲毒死曦伏誅蜀帥安丙楊輔以聞贈朝奉大夫直寶謨閣官二子諡節毅

楊炳

按泉州府志炳字若晦世永孫淳熙二年進士當道薦爲國子監錄遷左司諫論治臧吏當自大吏始累遷權吏部尙書時邊釁寢開與鄧友龍異議遂丐外疏用兵之害開禧三年除寶謨閣直學士奉祠卒

楊僕

按宋史楊存中傳存中子僕工部侍郎

楊倓

按宋史楊存中傳存中子倓簽書樞密院事昭慶軍節度使

楊揆

按宋史楊揆傳揆字純父撫州臨川人少能詞賦用故人薦出淮閫杜杲幕安豐被兵揆以奇策解圍奏補七官制置使孟珙辟于幕有大將立功珙坐受其拜揆爲動色因歎曰大將立功庭參納拜信兜鍪不如毛錐子也於是謝絕賓客治進士業遂登第調麻城尉向士璧守黃州檄入幕尋以戰功升三官無何得心疾遂調潭州節度推官卒贈架閣

楊令問

按萬姓統譜令問蜀人淳熙中進士爲職方員外郎

楊中希

按尚友錄中希字季達新津人微時客成都某氏主人少婦出而調之中希正色拒之其夜妻夢一

人告曰汝夫獨處他鄉不欺暗室神明知之當魁多士次年果擢第一

楊興立

按尙友錄興立字子權浦城人受業朱子知遂昌縣以道淑人學者多宗之稱爲船山先生所著有朱子語錄二十卷

楊復

按尙友錄復長溪人受業朱子與黃幹相友善著祭禮十四卷儀禮圖十四帙家禮雜說附註二卷

楊巨源

按宋史楊巨源傳巨源字子淵其先成都人父信臣客益昌因家焉巨源倜儻有大志善騎射涉獵諸子百家之書劉光祖薦之總領錢糧陳疇以右職舉爲鳳州堡子原倉官分差魚關糧料院移監興州合江贍軍倉吳曦叛巨源陰有討賊志結安丙李好義率其徒入僞宮執殺之丙權四川宣撫使巨源權叅贊軍事丙奏功於朝以巨源第一詔補承事郎關外四州爲蜀要害巨源力言不取必有後患自請爲隨軍措置糧運轉朝奉郎與通判差遣兼四川宣撫使司參議官先是獎諭誅叛詔

書至沔州巨源謂人曰詔命一字不及巨源疑有以蔽其功者俄報王喜授節度使巨源彌不平又遣懇功於朝而從興元都統制彭輅乞書與韓侂胄輅陽許而陰以白丙或言巨源與其徒謀爲亂正將陳安復告巨源結死士入關欲焚沔州州治俟丙出則殺之丙積前事因欲去巨源然未有以發也會巨源在鳳州以檄書遺金鳳翔都統使其辭若用間者且自稱宣撫副使而以參議官印印之金以檄至丙丙乃移書召巨源巨源還幕府丙密命輅收巨源械送閬州獄舟至大安龍尾灘將校樊世顯者呼於岸巨源知將見殺指其地而語之曰此好一片葬地左右遽取利刀斷其頭不絕者踰寸遂以巨源自殮聞成忠郎李琪投匭獻所作巨源傳爲之訟寃朝廷亦念其功賜廟褒忠贈寶謨閣待制加贈寶謨閣直學士太中大夫嘉熙元年理宗特賜諡忠愍子履正終大理卿四川制置副使

楊次山

按宋史楊次山傳次山字仲甫恭聖仁烈皇后兄也其先開封人曾祖全捍京城死事祖漸以遺澤補官仕東南家於越之上虞次山儀狀魁偉少好學能文補右學生后受職宮中次山遂霑恩得官